

An Exposition of the Seven Church Ages

Chapter Ten

A Resume of the Ages

Ka ntlha ya gore dithuto tsa rona di ne di tlhalosa ditemana tsa Dikwalo tse di buang ka dipaka tse di supa temana ka temana, ga re a ka ra tlhalosa thulaganyo e e tsweleng pele ya ditso tsa kereke jaaka re ne re tshwanetse. Ka jalo, jaanong re batla go bala kgaolo e, mme re simolole ka Paka ya Baefesia re bo re tlhatlhoba kereke le ditso tsa ya yone go ralala dipaka tsotlhe jaaka e ne ya newa Johane ke Moya wa Modimo. Ga re kitla re oketsa dilo tse disha go na le moo re tla di kopanya le tse re setseng re na le tsone.

Go tswa mo dithutong tsa rona re setse re ithutile gore karolo e kgolo ya Tshenolo ga e tlhalogangwe sentle ka gore re ne re sa itse pele gore 'kereke' e go buiwang ka yone le e e builweng le yone mo bukeng e ga e kaye 'eklesia' e e itshekileng, 'Bakgetlhwa,' 'mmele wa ga Keresete,' 'monyadiwa,' mme e bua le setlhopho sotlhe sa batho ba ba bidiwang Bakeresete, e ka tswa e le ba boammaaruri kana e le ba leina fela. Fela jaaka Iseraele yotlhe E SE Iseraele, Bakeresete botlhe le bone GA SE Bakeresete. Ka jalo re ne ra ithuta gore kereke e dirilwe ka mefine e mebedi, wa boammaaruri le wa maaka. Mefine e e mebedi e tlhotlhelediwa ke mefuta e mebedi ya mewa; e nngwe e na le Mowa o o Boitshepo fa e nngwe yone e na le mowa wa moganetsakeresete. Botlhe ka bobedi e ipolela gore ba itse Modimo e bile ba itsege ke ene. Boobabedi ba ipolela gore ba bua mo boemong ja Modimo. Boobabedi ba dumela dilo dingwe tsa motheo mme ba farologana ka tse dingwe. Mme ka boobabedi ba na le leina la Morena, ba bidiwa Bakeresete, mme ka go nna le leina leo ba bua gore ba na le kamano le Ene (Modimo o bitsa se lenyalo), jaanong Modimo o ba tsaya ba ikarabelela mo go Ene mme ka jalo o bua le mongwe le mongwe wa bone.

Gape re ne ra ithuta gore mefine e e mebedi e ne e tla gola e bapile go fitlhelela kwa bokhutlong ja metlha ya bofelo fa e ne e tla bo e butswa e bo e robiwa. Mofine wa maaka o ne o ka se fenye le go senya mofine wa boammaaruri, mme lefa go ntse jalo, mofine wa boammaaruri le one o ne o ka se kgone go dira gore mofine wa maaka o nne le kamano e e bolokang le Jesu Keresete.

Re ne ra ithuta boammaaruri jo bo gakgamatsang thata ja gore Mowa o o Boitshepo o ne o ka wela mo Bakereseteng ba ba sa sokologang ba ba sa ikanyegeng mme o ne o tla dira jalo mme o ne o tla bonala ka maatla a magolo ka ditshupo le dikgagamatsa tse di farologaneng, fela jaaka Judase a ne a na le bodiredi jo bo tlhomameng mo Moweng o o Boitshepo le mororo ene ka boene a ne a bolelwa e le diable.

Ka melaomtheo e re simolola go sala kereke morago go rtsamaya le dipaka tse di farologaneng tse supa.

Kereke e ne ya tlhomiwa ka Pentekosete. Fela jaaka Adame wa ntlha a ne a newa monyadiwa yo o neng a tswa mo seatleng sa Modimo mme a sa leswafala ka lobaka le lekhutshwane, Keresete, Adame wa bofelo, o ne a newa monyadiwa yo o phepa le yo o leswafetseng ka Pentekosete; mme o ne a nna a kgaogane le ene e bile a sa leswafala ka lobakanyana.

"Mme mo go ba bangwe botlhe ga go na motho ope yo o neng a ka itetla go ikopanya le bone"

(Ditiro 5:13) le

"Mme Morena a oketsa phuthego ka letsatsi le letsatsi ka ba ba bolokilweng."

Ditiro 2:47.

Ga re itse gore se se ne sa tswela ka lobaka le le kafe, mme letsatsi lengwe fela jaaka Efa a ne a raelwa le go tsiediwa ke Satane, le kereke le yone e ne ya kgotlelwa ke mowa wa boganetsakeresete.

"Mme o ke mowa wa boganetsakeresete o le setseng le utlule gore o tla tla, mme le jaanong o setse o le mo lefatsheng."

Johane 4:3.

Mme Jesu o ne a bua jaana ka monyadiwa wa Gagwe mo pakeng ya ntlha,

"Go na le sengwe se ke leng kgatlhanong le wena ka sone. O tlogetse lerato lwa gago laa ntlha. Gakologelwa ko o oleng teng mme o ikwatlhae."

Tshenolo 2:4-5.

Kereke e ne e setse e le 'mosadi yo o ole' mo pakeng eo ya ntlha. Fela jaaka Satane a ne a tsieditse Efa pele ga Adame, le jaanong Satane o ne a tsieditse kereke, monyadiwa wa ga Keresete, pele ga 'moletso wa lenyalo la Kwana.' Mme tota ke eng se se neng se le mo teng ga gagwe se se neng sa dira gore a we? Ke eng fa e se Tshenolo 2:6, "DITIRO TSA BANIKOLOA." Paka eo ya ntlha e setse fetogetse go sala morago Lefoko le le phepa la Modimo. Ba ne ba tlogela go dira se Modimo a neng a se batla ka kereke e e ikaegileng ka botlalo ka Ene (e e ikaegileng ka botlalo ka Modimo go diragatsa Lefoko la Gagwe go tswa kwa tshimologong go fitlha kwa bokhutlong kwantle ga puso ya batho) mme ba simolola go latela dithuto tsa ga Nicolaitan, tse di rulaganyang puso ya batho mo kerekeng e e dirang melao mo boemong jwa batho fela jaaka dipuso tsotlhe. Ba ne ba dira sone tota se Baiseraele ba neng ba se dira. Ba ne ba dirisa puso ya batho go na le Lefoko le Mowa.

Leso le ne le tsene. Re itse jang? A ga re utlwe lentswe la Moya le le neng la bolelelwa botlhe ba ba tla bong ba utlwa jaaka fa a bitsa ka pake eo ya ntlha? "Yo o fenyang ke tlaa mo naya gore a je setlhare sa botshelo se se mo paradaeseng ya Modimo." Kereke e ne e setse e nwetse thata mo setlhareng sa lesa (kana mofine wa maaka wa bodumedi) o bokhutlo ja one eneng ele letsha la molelo. Mme ga go na ditšheruba tse di nang le ditšhaka tse di tukang tse di disang Setlhare sa Botshelo gone jaanong. Modimo ga a tlhole atswa mo kerekeng jaaka a ne a tswa mo Edene. Nnyaa, o tla nna a le mo gare ga kereke ya Gagwe go fitlhelela mo pakeng ya bofelo. Mme go fitlhelela nako eo e goroga, O tla nna a bitsa botlhe gore ba tle.

Jaanong a re nneng le kelotlhoko fa. Molaetsa o o yang kwa moengeleng wa kereke e e kwa Efeso ga se molaetsa o o yang kwa kerekeng ya lefelo leo la Efeso. Ke molaetsa wa PAKA. Mme paka eo e ne e na le peo ya boammaaruri le peo ya e e seng ya boammaaruri jaaka go tlhalositswe mo setshwantshong sa korong le mefero. Dipaka tsa kereke ke tshimo, mme mo go yone go na le korong le mefero. Kereke ya maaka e ne ya rulaganya, ya dira gore motho a fetole Lefoko ka gonyadisa kereke le puso, mme ya lwa le Mokeresete wa boammaaruri.

Mofero o nna fela o gola thata o phophoma go gaisa korong kana semela sepe fela se sengwe. Kereke yamofero e ne ya gola ka bonako mo pakeng ya ntlha. Mme kereke ya korong le yone e ne e atlega. Kwa bokhutlong ja paka ya ntlha ditiro tsa Banikolaite di ne di ntse di gola mo dikerekeng tsa mofine wa maaka tsa lefelo leo ka maiteko a a ntseng a oketsega a go anamisa tlhotlheletso ya bone go feta mmele wa bone. Tlhotlheletso ya yone e ne ya utlwala mo kerekeng ya boammaaruri ka gone banna ba ba tshwanang le Polycarp yo o tlotlegang ba ne ba ipitsa bobishopo ka go dirisa sereto seo se se neng se seyo mo go yone go ya ka Lefoko. Gape mo pakeng eo, kereke ya boammaaruri e ne ya latlhegelwa ke lerato la yone la ntlha. Lerato leo le ne le tshwantshwa ke lerato la monyadiwa le monyadi fa ba nyalana le mo dingwageng tsa ntlha tsa lenyalo. Go ne ga nna le go tsidifala ga lerato leo le le feletseng le go ineela mo Modimong.

Mme elang tlhoko Tshenolo 2:1 e tlhalosa Morena Jesu jaaka yo o mo gare ga kereke ya Gagwe mme a tshwere baaposetoloi ka seatla sa Gagwe sa moja. Ka gore monyadiwa yo o ole, ka gore phuthego ya kereke jaanong ke motswako wa boammaaruri le maaka, ga a e tlogele. Ke ya Gagwe.

Mme go ya ka Baroma 14:7-9 seo ke boammaaruri tota.

"Gonne ga go na ope wa rona yo o itsheleng, gape ga go na ope wa rona yo o itshwelang.

Gonne le fa re tshela, re tshela Morena; le fa re swa, re swela Morena; Ka jalo le fa re tshela, le fa re swa, re ba Morena.

Ka go re go fitlhelela gompiano Keresete o ne a swa mme a tsoga, a ba a tsoga gape, gore a nne Morena wa baswi le batshedi."

O ne a reka lefatshe LOTLHE la batho mo sefapaanong. Ke ba Gagwe. Morena wa batshedi le baswi. (Fa e le ka go nna mong, E SENG kamano.) Mme o tsamaya mo gare ga mmele oo o o nang le botshelo le loso.

Se se neng se lemilwe mo pakeng ya ntlha se tla gola mo pakeng ya bobedi le mo sipakeng tsotlhe tse dingwe go fitlhelela se gola gape sa bo se robiwa. Ka gone, mo Pakeng ya Semerena re na le tsholofelo ya gore go tla nna le koketsego le tshedimoso ya ditso tsa kereke di senolwa ke Mowa.

Mo pakeng e letlhoo la mofine wa maaka le a oketsega. Bonang mo, (Temana 9) ba ikgaogantse le batho ba boammaaruri. Ba ne ba tswa mo go bone. E ne e le baaki. Ba ne ba ipitsa se ba seng sone. A mme Modimo o ne a ba senya? Nyaa. "Di tlogele fela mme tsotle ka bobedi di tla ko nakong ya go robiwa."

"Mme Morena ba tshwanetse go senngwa ka gore ba senya batho ba Gago.. Ba a ba bolaya."

"Nyaa, ba lese. Mme ke raya monyadiwa Wame ke re, 'Ikanyege go fitlhelela losong. O nthate le go

feta.”

Re ithuta ka phepafalo gore mofine o wa maaka ke mofine wa ga Satane. Go phuthega ga bone ke ga ga (Satane). Ba kopana ka Leina la Modimo mme ba bua maaka ba re ke ba ga Keresete. Ba a rera, ba a ruta, ba a kolobetsa, ba a obamela, ba nna le seabe mo ditirelong tse di farologaneng tse Keresete a di neileng kereke, le fa go ntse jalo ga se ba Modimo. Mme e re ka ba re ba teng, Modimo o tla dira gore ba nne le maikarabelo mme pakeng nngwe le nngwe o bua ka bone gape le bone. Ba re gopotsa Balaame. O ne a na le bodiredi ja seporofeti. O ne a itse tsela e e tshwanetseng ya go atamela Modimo jaaka go bontshitswe mo setlhabelong sa diphologolo tse di phepa. Lefa go ntse jalo e ne e se MOPOROFETA WA LEFOKO ka gore e rile fa Modimo a ne a mmolelela gore a se ka a ya go fa Balake tlotla ka go ya ko go ene a le ene o ne a batla go tsamaya le fa go ntse jalo ka gore o ne a tlhotlhelediwa ke keletso ya gagwe ya gouta le seriti. Modimo o ne a mo letelelela gore a tsamaye. Thato ya Modimo e e itekanetseng e ne ya emisediwa ke thato ya Modimo e e letlang dilo ka ntlha ya “keletso ya pelo ya ga Balaame.” Tota e bile, Modimo o ne a re, “Tswelela pele”. A Modimo o ne a fetola mogopolo wa Gagwe? Nyaa rra. Modimo o ne a dira se a neng a se batla go sa kgathalesege gore Balaame o ne a ya kae. Balaame ga a ka a fedisa thato ya Modimo. Le fa go ntse jalo, Modimo o ne a dira se a neng a se batla. Balaame ke ene a neng a latlhegelwa ka gonne o ne a itlhokomolosa Lefoko.

Mme gompieno re na le sone se se tshwanang. Basadi ba ba rerang, mekgatlho, dithuto tsa maaka, jalo le jalo, le batho ba ba obamelang Modimo, ba supa gore ba tlhotlhelediwa ke Mowa mme ba tswelela pele fela jaaka Balaame, ba bua gore Modimo o buile le bone le fa ba ne ba amogela thomo e e kgatlhanong le Lefoko le le senotsweng. Mme ga ke ganetse gore Modimo o ne a bua le bone. Mme go ne go ntse fela jaaka fa a ne a bua le Balaame lekgetlho la bobedi. Fela jaaka A ne A itse gore Balaame o ne a batla keletso ya pelo ya gagwe go feta Lefoko mme O ne A mo e naya, lefa go ntse jalo ka nako eo yotlhe kwa bokhutlong a dira ka TSELA YA GAGWE; le gompieno Modimo o bolelela batho gore ba tswelele pele mo dikeletsong tsa dipelo tsa bone gonne ba setse ba ganne Lefoko. LE FA GO NTSE JALO, THATO YA MODIMO E TLA DIRWA. Amene. Ke solofela gore le lemoga se. Ga e kitla e phepafatsa fela dilo tse dintsi tse di bonweng mo pakeng yotlhe mme gape e tla thusa thata mo pakeng e ya bofelo e e nang le dipontsho tse dintsi le ditshegofatso the di bonalang fa nako yotlhe e le kgatlhanong thata le 'Lefoko le le senotsweng ka thata ya Modimo.

Fa e le gore go kile ga nna lepaka e e neng ya amogela molaetsa o o utlwalang sentle, ke paka e. E ne e le boammaaruri ja Tesetamente e Kgologolo, mme e sa ntse e le bone, gore “morwa wa lelata o tla bogisa morwa wa mosadi yo o gololesegileng go fitlhelela morwa wa lelata a kobiwa.” Seo se re bolelela gore lethoo le thapatso ya ga Satane kgatlhanong le Mokeresete wa boammaaruri di tla senolwa ka setlhopho sa Bakeresete ba ba ipitsang, ba maaka, mme se se tla oketsega go fitlhelela Modimo a kumola mofine oo wa maaka kwa bokhutlong ja paka ya Laodikia.

Paka ya boraro e ne ya senola ka Mowa wa boperofeti gore kereke ya lefatshe e ne e tla amogela thuto ya ga Senicolaitane. Go kgaogangwa ga baruti le batho fela go ne ga simolola ka boammaaruri ja Baebela ja gore bagolwane (badisa ba letsomane la lefelo lengwe) ba ne ba busa letsomane ka Lefoko, go ya ko 'ditiro tsa Banikolaite' tseo mo go tsone baruti ba neng ba ipaya mo maemong a a kwa godimo ga a bangwe, e leng mokgwa o o sa dumalaneng le Dikwalo oo morago ga foo o neng wa fetoga boperesiti jo bo neng bo baya baruti fa gare ga motho le Modimo, bo naya baruti ditshwanelo tse di rileng fa ka nako e e tshwanang bo gana batho fela ditshwanelo tsa bone tse ba di filweng ke Modimo. Se e ne e le go gapa. Mo pakeng e e ne ya nna thuto. E ne ya tlhomamisiwa mo kerekeng jaaka lefoko le le tlhomamisitsweng la Modimo, leo eleruri e neng e se lone. Mme baruti ba ne ba e bitsa Lefoko la Modimo mme ka gone thuto eo e ne e le moganetsakeresete.

Ka gore puso ya motho ke dipolotiki fela, kereke e ne ya tsenelela mo dipolotiking. Go nna le seabe go ne ga amogelwa ke mmusimogolo wa mmusaesi yo o neng a kopanya dipolotiki tsa kereke le dipolotiki tsa puso mme a dirisa dikgoka go tlhoma kereke ya maaka (bodumedi ja maaka ja ga Satane) jaaka bodumedi ja boammaaruri. Mme ka melao e e farologaneng ya babusibagolo ba ba farologaneng re fitlhela kereke ya maaka e e nang le maatla a puso e senya mofine wa boammaaruri le go feta.

Ka maswabi, mofine wa boammaaruri o ne o sa sireletsega mo thutong e. Ka go rialo ga ke reye gore mofine wa boammaaruri o kile wa tlhoma megopolo ya Nicolaita jaaka thuto. Ba kgakala le yone. Mme seboko seo se sennyane sa leso se ne sa nna se anya mo setlhareng sa boammaaruri sa mofine se solofetse gore se ka wa. Tota le mo kerekeng ya boammaaruri, banna ba Modimo a neng a ba biditse go nna balebedi ba ne ba tsaya maemo ao a a kayang sengwe se se fetang fela boikarabelo ja lefelo la bone. E ne e se tsela e e utlwalang sentle e Paulo a neng a tlhologanya dilo ka yone e e neng e le teng mo kerekeng ka nako eo. Gonne Paulo o ne a re, “Mme ba galaetsa Modimo ka nna.” Go sa kgathalesege gore Paulo o ne a na le taolo e e kana kang, o ne a dira gore batho ba lebe kwa Modimong yo o nang le taolo yotlhe. Mme baruti ka nako tsotlhe ba ne ba leba kwa Boeteledipeleng ja Bomodimo LE MOTHO, mme ka gone fa ba ne ba naya tlotlo koo e neng e sa ba tshwanela, re fitlhela gore kereke ya boammaaruri e ne e na le setho. Fa go sena go tlhomiwa Senicolaitane—go tlhatlhamana ga baaposetoloi—go tlhomiwa badiredi—go tlhophiwa baruti, jalo le jalo, go ne go setse go le kgato e le nngwe fela gore

kereke ya maaka e fetele kwa go Balaame. Kgato ya bobedi ya go ya kwa 'moleteng wa ga Satane' e ne e setse e tsweletse.

Kgato e ya bobedi e ne e le thuto ya ga Balaame, (e e tlhalosiwang mo go Tshenolo 2:14) eo mo go yone Balaame a neng a ruta Balake go kgopisa bana ba Iseraele ka 'bokopano jo bo tshwaraganeng.' Koo baeng ba neng ba tla dira dilo tse dingwe gape tse pedi tse di kgatlhanong le Lefoko la Modimo. Le tla gakologelwa gore Balake o ne a tlhoka thuso gore a tshegetse bogosi ja gagwe. O ne a bitsa motho yo o neng a itsege thata ka dilo tsa semowa ka nako ya malatsi a gagwe e bong Balaame. Balaame o ne a fa kgakololo e e neng ya dira gore Baiseraele ba wele mo selageng mme ya ba senya. Sa ntlha, ke ne ke batla go ba akantsha gore ba kopane botlhe mme ba bue ka dilo, ba je mmogo mme ba rarabolole dilo. Tota e bile, go tlhologanya ba bangwe go botlhokwa thata. Fa o sena go dira jalo, o ka tswelela pele. Kgato e e latelang e ne e tla nna go obamela mmogo, mme ke boammaaruri gore, kgatelelo e nnye e e tswang mo go yo o laleditseng gantsi e dira gore baeng ba ye kgakala go feta kafa ba neng ba ikaeletse ka teng. Jaanong seo ga se a ka sa diragalela fela kereke ya Modimo ya Tesetamente e Kgologolo mme gape se ne sa diragalela kereke ya Tesetamente e Ntšha, ka gonne go ne go na le mmusimogolo, yo jaaka Balake a neng a tlhoka thuso go sireletsa bogosi ja gagwe.

Ka jalo Constantine o ne a laletsa batho ba ba ipitsang Bakeresete, Kereke ya ntlha ya Bokeresete ya Roma, gore e mo thuse go ema Bakeresete nokeng, ka gonne e ne e le sethlopha se segolo thata. Se se ne sa felela ka Lekgotla la Nicaea la 325. Bakeresete ba boammaaruri le ba ba ipitsang Bakeresete ba ne ba kopana koo ka taletso ya ga Constantine. Bakeresete ba boammaaruri ba ne ba sa tshwanela le e leng go ya dipokanong. Go sa kgathalesege se Constantine a neng a ka se dira go ba kopanya botlhe, badumedi ba boammaaruri ba ne ba itse gore ga ba a tshwanela go bo ba le koo mme ba ne ba tsamaya. Mme ba ba neng ba sala, Constantine o ne a ba fa madi a puso mmogo le thata ya sepolotiki le ya go dirisa dikgoka ka mmele. Batho ba ne ba simolola go obamela medingwana le go dirisana le mewa, ka gonne go ne go bewa difikantswe tse di nang le maina a baitshepi mo dikagong mme batho ba ne ba rutiwa go buisana le baswi, kana go rapela baitshepi, e leng selo se e seng sepe fa e se gp dirisa medimo ya disetwa. Gore ba bone dijo tse motho a di tlhokang tota, eleng Lefoko la Modimo, ba ne ba fiwaa ditumelo, le dithuto le ditirelo tsa medingwana eo le yone e neng e patelediwa ke puso, mme mo godimo ga tsotlhe ba ne ba fiwa medimo e meraro eo e nang le leina le le kopantsweng gararo la Modimo a le Mongwe wa Boammaaruri, mme kolobetso ya metsi mo Leineng la Morena Jesu Keresete e ne ya emisetswa ka kolobetso ya boheitane ya direto tse tharo.

Badumedi ba boammaaruri ba ne ba sa tshwanela go ya koo. Ba ne ba setse ba latlhegetswe ke boammaaruri jo bontsi, mme jaanong le bone ba ne ba tla latlhegelwa ke go tlhologanya Bomodimo mme ba latlhegelwe ke maina a ba neng ba a filwe fa ba kolobediwa mo metsing.

Jaanong tlhokomela thuto e ya ga Balaame ka kelotlhoko. Ela tlhoko gore go na le baruti ba ba bosula ba ba dirang ka boomo gore batho ba ba obamele ka go ba gogela mo boleong ja go tlhoka tumelo. Thuto ya Banikolaite e ne e le go senyega ga baruti fa ba ne ba batla go nna le taolo ya sepolotiki mo gare ga bone, fa Bo-Baalame e ne e le go dira gore batho ba ineele mo thulaganyong ya bone ya tumelo le kobamelo gore ba kgone go ba laola. Jaanong lebelela ka kelotlhoko. Ke eng se se neng sa dira batho botshwarwa mo kerekeng mme sa bo se ba senya? E ne e le ditumelo le dithuto tse di neng tsa fetoga dithuto tsa kereke. E ne e le thuto ya Kereke ya Roma ya Katoliki. Ba ne ba sa fiwa dijo tsa tsa boammaaruri, eleng Lefoko.. Ba ne ba fiwa dijo tse di neng di tswa mo kobamelong ya badimo ba disetwa, boheitane ja Babelona jo bo neng bo fitlhiwle ka mafoko a Bokeresete.

Mme mowa oo le thuto eo di boammaaruri mo Baporotesetanteng botlhe mme o bidiwa lekoko la phuthego. Bo-Nikolai ke mokgatlho, o dira gore batho ba etelele pele kereke, mme ka go dira jalo o ntshetsa ko ntle ketelelopele ya Mowa. SeBalame ke bodumedi ja makoko a dikereke jo bo dirisang buka ya e e nang le dikaelo boemong ja Baebale. Mme le mo nakong e, bontsi ja batho ba Modimo ba wetse mo seraing sa makoko a dikereke mme Modimo o ba goeletsa jaana: "Tswang mo go ene batho Bame, gore le tle leo se ka la tlhakanela le ene mo maleong a gagwe, le gore le se ka la amogela dipetso tsa gagwe." A le bona gore ga ba itse sepe. Mme fa e le gore go phamolo e ka diragala go ne jaanong, go tlhoka kitso ga go ka ke ga emisa Modimo go athola baikepi.

Fa baruti ba rulaganyetsa gore ba nne le maemo a a kwa godimo ga a mangwe go fitlhelela ba etelelwa pele ke poresidente, ke go supa mowa wa moganetsakeresete, go sa kgathalesege gore seo se ka lebege se kgatlha e bile se tlhokega go le kana kang. Ga se sepe fela fa e se mabaka a batho a a tselang Lefoko sebaka. Mme mongwe le mongwe yo o mo makokong a dikereke a a rulagantsweng o mo gare ga tsamaiso ya boganetsakeresete. Jaanong mme ke bue se ka tthamalalo. **GA KE KGATLHANONG LE BATHO. KE KGATLHANONG LE TSAMAIISO.**

Kopano ya kereke le kereke, se se ne se tlhoma Dipaka tsa Lefifi. Mme eleruri kereke e ne ya tsena mo lefifing le legolo ka dingwaga di ka nna sekete, e itse boteng jw ga Satane. Fa batho bape fela ba ba dumelang mo bodumeding ba amogela dithuto tsa ga SeNikolaitene le SeBalame, mme ba na le maatla a sepolotiki, a itshulelo le a senama go, go na le tsela e le nngwefela e ba e tsanyang. Tsela ya kaelo eo e

isa gone ko thutong ya ga Jesebele.

Jaanong ke eng fa re bua jaana? Ka gonne jaaka re ne ra supile mo thutong ya paka ya bone gore Jesebele e ne e le Mosidona, morwadia Ethbaal yo e neng e le kgosi le moperesiti wa ga Ashetharetha. E ne e le mmolai. Mosadi yo o ne a nyalwa ke Ahabe (Kgosi ya Iseraele) ka ntlha ya mabaka a sepolotiki. Go tswa foo o ne a tsaya bodumedi ja batho mme a bolaya Balefi, a aga ditempele tse mo go tsone a neng a dira gore batho ba obamele Astarte (Venus) le Baale (modimo wa Letsatsi). O ne a simolola thuto eo mme a dira gore baperesiti ba gagwe ba e rute, mme bone ba dira gore batho ba e amogele.

Foo le kgona go bona sentle gore kereke ya leina e ne e ntse jang mo Pakeng ya Bogare Ba ne ba tlogela Lefoko la Modimo gotlhelele kwantle ga maina le direto tsa Bomodimo le melaometheo e sekae ya Dikwalo. Ba ne ba sokamisa se ba neng ba se tsaya mo Baebeleng ka go fetola bokao ja yone. Lekgotla la bone la bobishopo, jalo le jalo, le ne la kwala dibuka tse dikgolo, bomopapa ba bone ba ne ba ipolela gore ga ba dire diphoso mme ba bua gore ba ne ba amogela tshenolo go tswa ko Modimong mme ba bua jaaka Modimo mo bathong. Baperesiti ba ne ba ruta batho dilo tse tsotlhe ka gore ba ne ba boifa gore batho ba tla dumela. Fa motho a ne a sa dumalane le se a se dumelang o ne a bolawa kana a kgaolwa mo kerekeng, mo e ka nna ya nna selo se se maswe go feta lesa. E ne e le kereke e jaanong e neng e na le lentswe le le tlhomamisitsweng e e neng e laola, mme e ne ya bolaya baswelatumelo ka thata ya yone e e kgolo go fitlha Bakeresete ba boammaaruri ba nyelediwa mme go ne go setse Lefoko le le lengwe fela, le go ponalo e nnye ya Mowa o o Boitshepo. Mme mofine wa boammaaruri o ne wa sokola mme wa kgona go tshela. Modimo o ne a ikanyega mo letsomaneng le lennye mme go sa kgathalesege gore Roma e ne e ka thokofatsa mmebele ya bobee jang, Roma e ne e sa kgone go bolaya Mowa o o mo go bone, mme lesedi la Boammaaruri le ne la phatsima, le tshegediwa ke Mowa o o Boitshepo le maatla.

Se se fa kelotlhoko e e sedimotsweng. Lebelelang. Ditiro le dithuto tsa Banikolaite, thuto ya ga Balaame, le thuto ya moporofeti wa mosadi wa maaka, Jesebele, ga di dire mewa e meraro kana go dira melaometheo e meraro ya semowa. Dilo tse tse tharo ke dilo tse di farologaneng tse di bontshang mowa o le mongwe fela fa o ntse o anama go tswa boteng go ya boteng. Se e leng sone, ke mowa wa mokgatlho wa boganetsakeresete o o nang le magato a a mararo a a farologaneng. Fa baruti ba sena go ikgaoganya le go ipopa, ba ne ba gatelela batho ka go ba gogela mo mokgatlhong, le go ba pateletsa gore ba o dire. Phuthego e e ne e theilwe mo tumelong le mo dingwaong tse ba neng ba di ruta batho go na le Lefoko le le phepa la Modimo.

Dingwao le meletlo di ne tsa nna le seabe se segolo thata mo kobamelong, mme go ise go ye kae tsamaiso e yotlhe e ne ya nna le maata a botlhabani le botimone a a neng a dira bojotlhe ja one go laola sengwe le sengwe ka tlhotlheletso ka na ka go patika. E ne ya amogela nonofogotswa mo seporofesong sa yone sa maaka mme e seng mo Lefokong la Modimo. E ne e setse e le moganetsakeresete tota le fa e ne e tliile ka Leina la ga Keresete.

Morago ga se se neng se lebega e le nako e e sa feleng eo mo go yone Boammaaruri bo neng bo tshwanetse go swa, batho ba ne ba simolola go ngongorega ka boikepo ja Kereke ya Roma ya Katoliki, ka gonne go ne go ka se kgonege gore Modimo a nne mo thutong le mo boitshwarong jo bo ntseng jalo. Dingongorego tse di ne tsa itlhomakomolosiwa mme tsa swa ka gonne batho bane ba seka ba di kgatlhegele, kana di ne tsa nyelediwa ke Roma. Mme go tswa foo, Modimo o ne a romela morongwa yo o bidiwang Martin Luther gore a simolole diphetogo. O ne a berekela mo maamong a bosa a mo go one Kereke ya Katoliki ya Roma e neng e neilwe kgololesego e e ntsi mo baneng ba kgona go dira sengwe le sengwe se se neg se ka nna kotsi mo go bone. Erile fa Luther a rera ka tshiamo ka tumelo mofine wa boammaaruri o ne wa simolola go gola ka tsela e e humileng ka lekgetlho la ntlha mo makgolong a mantsi a dingwaga.

E re ka kereke e ne e dirisitse thata ya puso go e tshegetsatsa, jaanong thata ya puso e ne e simolola go e tlasela. Mme fa ke gone fa Luther a neng a dira phoso teng, mme badumedi ba boammaaruri le bone ba ne ba dira phoso. Ba ne ba letla puso go ba thusa ka madi. Ka jalo paka e ga e a simologa kgakala le Lefoko. Re leboga Modimo gore e ne ya tsamaela kgakala jaaka e neng ya tsamaya, mme ka gore e ne e ikaegile thata ka thata ya sepolotiki, paka e e ne ya fela ka go nna lekoko le le rulagantsweng, mme setlhopha se se se neng sa kgaogana le mofine wa maaka mo kokomaneng ya ga Luther, jaanong se ne sa boela morago go nna morwadia seaka ka gonne se ne sa boela ko bokopanong ja Bonikolaitaneng le ja ga Balaame. Nako e e ne e na le makgamo a mantsi mo go yone, mme go supa ka fa ba neng ba le kgakala ka teng le peo ya boammaaruri ke go bala fela mo ditsong le go bona kafa makgamo a a neng a bogisanya ka teng, mo nakong tse dingwe ba ne ba felela ba bolaana. Mme go ne go na le maina a le mmalwanyana mo gare ga bone, fela jaaka go ntse ka pakeng nngwe le nngwe.

Re a ipela mo pakeng e ka ntlha ya selo se se sengwefela. Diphetogo di ne di simolotse. E ne e se tsogo mme e ne e le phetogo. Le gone e ne e se go tsosolosa. Mme korong e e neng ya swa kwa Nicaea mme ya bola mo Dipakeng tsa Lefifi, jaanong e ne ya ntsha letlhogela la boammaaruri le le neng le kaya gore ka nako nngwe mo isagweng, kwa bokhutlong jwa Paka ya Laodikia, pele fela ga Jesu a tla, kereke e ne e tla boa gape e nna Monyadiwa wa Peo ya Korong fa mefero e ne e tla robiwa le go fisiwa mo

letsheng la molelo.

E re ka paka ya botlhamo e ne e dirile gore Lefoko le anamisiwe thata ka go gatsiwa, paka ya borataro e ne ya dirisa sebaka seo ka bonako. Paka e ne e le ya bobedi ya go tsosolosiwa mme jaaka re umakile, e ne e le paka ya ditedu. Thuto e ne ya nna ntsi. E e ne e le paka ya batho ba ba botlhale ba ba neng ba rata Modimo e bile ba mo direla. Barongwa ba ne ba ntsifala mme Lefoko la anama le lefatsheng lotlhe. E ne e le paka ya lerato la bokaulengwe. E ne e le paka ya dikgoro tse di bulegileng. E ne e le paka ya bofelo ya lebaka le lelele, mme morago ga yone go ne go tla tla Paka ya Laodikia e e neng e tla nna o o mokhutshwane.

Mofine wa boammaaruri o ne wa atlega thata mo pakeng e go feta le fa e le leng pele fa motho a akanya ka dipalo tsa ko gagabo le kwa dinageng di sele. Paka e e ne ya tsa banna ba ba boitshepo ko pele. Mofine wa boammaaruri o ne wa anama mme wa maaka wa koafala. Gongwe le gongwe koo mofine wa boammaaruri o neng o ya teng Modimo o nefa lesedi le botshelo le boitumelo. Mofine wa maaka o ne wa supiwa gore ke eng: e ne e le lefifi, khumanego, lehuma, go sa itse go bala le go kwala le loso. Mme fela jaaka mofine wa maaka o ne o sa kgone go bolaya mofine wa boammaaruri mo pakeng ya yone ya go busa, le gone jaanong mofine wa boammaaruri o ne o ka se kgone go busetsa mofine wa maaka kwa go Jesu Keresete. Mme mofine wa maaka o ne wa itsetsepela, o emetse karolo ya bofelo ya paka ya bofelo fa o ne o tla gapa botlhe gape kwantle ga letsomanyane leo e neng e le ba ba kgethlilweng, mofine wa boammaaruri wa Modimo.

Mme a bo paka e e utlwa bothoko jang fa re lemoga gore kgato nngwe le nngwe e kgolo ya Modimo (mme di ne dile dintsi) e ne ya se ka ya latlha thuto SeNikolaitane ka gore botlhe ba ne ba nna lekoko mme ba a swa. Go tswa foo ba ne ba tsena mo makokong a a farologaneng gore ba tshwarelela ba ba neng ba sule mo semoyeng ko go neng go sena mafulo. Ba ne ba sa itse, gore setlhopha sengwe le sengwe se ne se kgotletswe ke phoso e e tshwanang, mme fa molelo wa tsosoloso o ne o ya ko tlase, go rulaganya go ne ga tsaya taolo mme a fetoga makoko. E ne e le Bakeresete ba leina fela le mororo setlhopha sengwe le sengwe se ne se bua ka tlhomamo e e tshwanang le ya Kereke ya Roma ya Katoliki gore se ne se nepile mme ba bangwe botlhe ba ne ba le phoso. Go ne go setse go rulagantswe sentle gore bomorwadie ba boele gae mo pakeng ya bofelo, kwa Roma, kafa tlase ga mmaabone.

Mme ka jalo re tla mo pakeng ya bofelo: Paka ya Laodikia. Ke paka ya rona. Re a itse gore ke paka ya bofelo ya gore Bajuda ba boele kwa Palesetina. Go sa kgathalesege gore ba ne ba tsenang jang koo, ba teng. Mme e ke nako ya thobo. Mme pele ga go ka nna le thobo go tshwanetse ga nna le go butswa, go butswa ga mefine ka bobedi.

Paka ya Lutere e ne e le nako ya dikgakologo. Paka ya ga Wesley e ne e le nako yaselemo ya kgolo. Paka ya Laodikia ke nako ya thobo ya go phutha mefero go e bofa le go e fisa; le go phuthela korong mo Moreneng.

Nako ya thobo. A le etse tlhoko gore ka nako ya thobo, dimela di gola tsa bo di butswa ka bonako, go nna le go gola ka bonya go fitlhelela go gola go ema? A ga se sone se re se bonang gone jaanong? Mofine wa maaka o latlhegelwa ke batho ba le bantsi ka ntlha ya Bokomonisi le mefuta e mengwe e e farologaneng ya tumelo. Palo ya bone ga e oketsege jaaka a batla gore re akanye. Tsela e a tshwareletseng batho ka yone ga e tlhole e tshwana le pele, mme gantsi go ya kerekeng ke goya go itshupa. Mme mofine wa boammaaruri one? Go tweng ka ene? A o a gola? Dipalo tse dikgolo tseo tsa batho ba ba nngang ba tla kwa ditsosolosong mme ba bo ba tla kwa dialetareng di ile kae? A bontsi ja bone ga ba bue fela ka maikutlo, kana ba eletsa sengwe se se bonalang go na le go eletsa se tota e leng sa Semowa? A paka e ga e tshwane le ya fa Noa a ne a tsena mo arakeng, mme kgoro ya bo e tswalwa, mme lefa go ntse jalo Modimo o ne wa leta mo katlholong malatsi a le supa? Go ne go se na ope yo o neng a sokologela kwa Modimong ka tsela ya mmatota mo malatsing ao a tidimalo.

Le fa go ntse jalo, ke nako ya thobo. Ka nako eo go tshwanetse ga tlhaga batho mo pakeng e ba ba tla dirang gore korong le mefero di gole. Mefero e setse e butswa ka bonako thata ka ntlha ya barutisi ba ba bosula ba ba faposang batho mo Lefokong. Mme korong le yone e tshwanetse go butswa. Mme Modimo o romela Moperofeti wa Morongwa kwa go ene (korong) ka bodiredi jo bo tlhomamisitsweng gore a tle a amogelwe ke ba kgethlilweng. Ba tla mo utlwa jaaka kereke ya ntlha e ne ya utlwa Paulo, mme o tla gola mo Lefokong go fitlhelela a nna Monyadiwa wa Lefoko. Ditiro tse di maatla di tla fitlhelwa mo go ene tse ka nako tsotlhe di tsamaisanang le Lefoko le le phepa le tumelo.

Ditlhopha tsa dikereke tsa maaka di tla kopana go tla go dira lekgotla la lefatshe lotlhe la dikereke. Lekgotla le la dikereke tsa lefatshe lotlhe ke SETSHWANTSHO SE SE TSHOLEDITSWENG SEBATA.

Tshenolo 13:11-18,

"Mme ka bona sebatana se sengwe se tshatloga mo lefatsheng; mme se ne se na le dinaka di le pedi jaaka kwana, mme se bua jaaka kgogela.

Mme se dira ka taolo yotlhe ya sebatana sa pele mo ponong ya sone, mme sa dira gore lefatshe le ba ba agileng mo go lone, gore ba obamele sebatana sa pele, se go rengwa ga sone ga loso go ne go fodile.

Mme se dira ditshupo tse dikgolo, gore se dire gore se folose molelo kwa legodimong, o tle mo lefatsheng mo ponong ya batho,

Mme se tsietsa ba ba agileng mo lefatsheng, ka ntlha ya ditshupo tse se neilweng thata ya go di dira mo ponong ya sebatana; se reye ba ba agileng mo lefatsheng se re, ba direle sebatana setshwantsho, e bong sone se se nang le lobadi lwa tšhaka, mme se tshedile.

Mme sa newa thata ya go se tsenya mowa, e bong setshwantsho sa sebatana, gore se bue, se be se dire gore botlhe ba ba sa obameleng setshwantsho sa sebatana ba bolawe.

Mme se patelele botlhe, banye le bagolo, bahumi le bahumanegi, ba e leng bana ba motse le bathanka, gore ba bewe lotshwao mo seatleng se segolo, kgotsa mo phatleng:

Mme le gore go se nne motho ope yo o ka rekang le fa e le go bapatsa, fa e se yo o nang le lotshwao, e bong leina la sebatana, kgotsa palo ya leina la sone.

Botlhale ke jo. Yo o nang le tlhaloganyo, a a bale palo ya sebatana; gonne ke palo ya motho: palo ya sone ke 666."

Gakologelwang, e ne e le Roma ya Baheitane e e neng ya bolawa ka tšhaka. Mme o ne a fodisiwa bolwetse ja gagwe ja setorooko se se bolayang fa a ne a kopanela le kereke ya Bokeresete ya kwa Roma mme a kopanya boheitane le Bokeresete, mme ka go dira jalo a nna Mmusomogolo o o Boitshepo wa Roma o o neng o tla tswelela o le teng go fitlha Jesu a tla go o senya. Mme Roma ga e ye e le nosi. Bomorwadie ba mo ema nokeng mme o tla nna le taolo e e feletseng mo Lekgotleng la Lefatshe Lotlhe la Dikereke.

Se se ka nna sa lebega se sa utlwale mo go bangwe mme tota se phepafetse mo go botlhe ka gonne gone jaanong dikereke di laola dipolotiki mme ka nako e e tshwanetseng di tla supa kafa taolo eo e leng kgolo ka teng. Kgato e ya go kopanya dikereke e tla felela e eteletswe pele ke Roma le fa batho ba ne ba sa e lebelela jalo. Se ke ka gonne mo go Tshenolo 17:3-6 go buiwa gore seaka, Masaitseweng a Babelona se ntse mo sebataneng. O laola Mmusomogolo wa bofelo, kana wa bone. Kereke e ya Roma e dira jalo. Ka tsamaiso ya lefatshe ya kereke e e tla bong e tla bo e le Roma e laolang, mme setshwantsho se (tsamaiso ya kereke) se tla bo se ikobela Roma ka gonne Roma e laola gouta ya lefatshe.

Ka jalo batho botlhe ba tshwanetse go nna maloko a kereke ya lefatshe lotlhe kana ba nne mo taolong ya maatla a tlhologo ka gonne ga ba ka ke ba reka kana ba rekisa kwantle ga letshwao la sebatana mo seatleng kana mo thogong. Letshwao le le le mo thogong le raya gore ba tla tshwanelwa ke go tsaya thuto ya tsamaiso ya kereke ya lefatshe lotlhe eo e leng boraro mo bongweng, jalo le jalo, le letshwao le le mo seatleng le raya raya go dira thato ya kereke ya lefatshe. Tsamaiso ya kereke e tla dirisa taolo e e kgolo e, go bogisa monyadiwa wa boammaaruri. Setshwantsho se se tla leka go kganela monyadiwa go rera le go ruta, jalo le jalo. Badiredi ba gagwe ba tla kganelwa go gomotsa le go bolelela batho ba ba tlhokang kgomotso boammaaruri Mme pele ga moganetsakeresete (ka sebele) a tsaya tsamaiso e yotlhe ya lefatshe ya dikereke, kereke ya boammaaruri e tla tsewa mo lefatsheng le gore e ye go nna le Morena. Modimo o tla phamolamonyadiwa wa Gagwe gore a tle kwa Moletlong o mogolo wa Lenyalo la Kwana.

Jaanong ka kgaolo e e e konelang e ne ya fiwa go lemoga dikereke tse pedi le mewa e mebedi go tloga ka Pentekosete go ya kwa bokhutlong ja yone, re tla tsaya nako e ya bofelo go supa se mo Pakeng ya Laodikia.

Paka e e simolotse fela morago ga tshimologo ya lekgolo la bomasome a mabedi a dingwaga E re ka e ne e tlile go nna paka e kereke ya boammaaruri e neng e tla boela go nna monyadiwa jaaka e ne e ntse ka Pentekosete, re itse gore go tshwanetse ga bo go na le go boa gape ga maatla a a nonofileng. Badumedi ba ne ba lemoga se mo meweng ya bone mme ba simolola go ikuela mo Modimong gore a ba fe madi a masha a a tshwanang le a ba neng ba a fiwa mo lekgolong la ntlha la dingwaga.

Se se neng se lebega e kete ke karabo se ne sa tla fa ba le bantsi ba ne ba simolola go bua ka diteme mme ba bontsha dimpho tsa mowa. Ka nako eo go ne go dumelwa gore ruri eno e ne e le PUSELETSO e e sa bolong go letelwa. E ne e se jalo, ka gore pula ya morago e ka tla fela morago ga pula ya ntlha e e leng pula ya dikgakologo kana ya go THUTO. Ka jalo, pula ya bofelo ke pula ya THOBO. Se se ne se ka direga jang fa Pula ya go Ruta e ne e ise e tle? Moperofeti wa Morongwa yo o neng a tshwanetse go romelwa go RUTA batho le go busetsa dipelo tsa bana kwa go borre ba Pentekosete o ne a ise a tle. Ka jalo se go neng go akanngwa gore ke go buseletswa le go tshediswa ga bofelo go ya ko phamolong go ne go ise go diragale. E ne e le motswako wa go nna le karolo mo tshagofatsong tsa

Semowa ka tsela e e sa siamang le go bonala ka Mowa o o Boitshepo jaaka re ntse re l supegetsa. Gape e ne e na le maatla a ga diabole ka gore batho ba ne ba laolwa ke matimona, mme go ne go lebega go se na ope yo o neng a lemoga seo. Go tswa foo, gore ba supe gore e ne e se ya BOAMMAARURI, batho ba (le e leng pele ga kokomana ya bobedi e tlhaga) ba ne ba rulaganya, ba kwala dithuto tsa bone tse di seng mo Dikwalong mme ba ikagela meletlwane jaaka setlhophha sengwe le sengwe se se neng se ba eteletse pele.

Gakologelang, fa Jesu a ne a le mo lefatsheng, Judase le ene o ne a le teng. Nngwe le nngwe e ne e tswa mo moweng o o farologaneng, mme fa e swa nngwe le nngwe e ne ya ya kwa mafelong ya one. Moragonyana Mowa wa ga Keresete o ne wa boela mo kerekeng ya boammaaruri, mme mowa wa ga Judase o ne wa boela mo kerekeng ya maaka.

Go teng foo mo go Tshenolo. 6:1-8,

"Mme ka leba, mme bonang, ga bo go le pitse e le tshweu, yo o e pagameng a bo a tshotse bora; mme a newa serwalo, mme a tswa a fenyaa, a ba a tswelela pele go fenyaa. Mme e rile f a sena go kanolola sekano sa bobedi, ka utlwa setshedi sa bobedi se re, Tlaya mme o bone.

Mme ga tswa pitse nngwe, e le pitse e khunou; yo o e pagameng a newa gore a tlose kagiso mo lefatsheng, le gore batho ba bolaane; mme a fiwa tshaka e tona.

E rile a sena go kanolola sekano sa boraro, ka utlwa setshedi sa boraro se re, Tla o bone. Ka leba, mme bonang ga bo go le pitse e ntsho; yo o e pagameng a bo a tshotse selekanyo sa pego ka seatla.

Ka utlwa e kete lentswe mo gare ga ditshedi tse nne le re, seelwanyana sa korong ke tefo ya peni, le dielwanyana di le tharo tsa barele ke tefo ya peni; mme o se ka wa senya lookwane le mofine.

E rile a sena go kanolola sekano sa bone, ka utlwa lentswe la setshedi sa bone le re, Tla mme o bone.

Mme ka leba, mme bonang, ga bo go le pitse e tshetlha; yo o e pagameng, leina la gagwe go tse Loso; Bobipo a bo a na nae a mo setse morago. Mme ba newa taolo ya go re, lefatshe fa le kgaogangwa sene, ba bolaye kgaolo ya sene ka tshaka, le ka popamo, le ka loso, le ka dibatana tsa lefatshe."

Bona gore mowa wa ga Judase o ne wa boa jang e le mopalami wa pitse e tshweu. E ne e le tshweu. E ne e le gaufi thata le boammaaruri, fela jaaka Judase a ne a le gaufi thata le Jesu. O ne a neelwa serwalo sa korone (mopalami wa pitse e tshweu). Jang? Mowa o o jaanong o ne o le eteletse pele tsamaiso ya SeNikolaetane mme e ne e le mopapa yo o neng a rwesitswe serwalo sa korone tse tlharoo yo o neng a nna jaaka Modimo mo tempeleng ya gagwe, a ipitsa moemedi wa ga Keresete. Fa e le gore vicar of Christ e raya 'mo boemong ja ga Keresete' kana 'mo boemong ja' kana 'mo boemong ja Modimo' jalo mopapa o ne a ipitsa Mowa o o Boitshepo, kana a ntsha Mowa o o Boitshepo, a dira mo boemong ja Gagwe. Se e ne e le mowa wa ga Judase mo go ene. Bona kafa a neng a fenyaa—a tsamaya a tswelela ka go fenyaa le go fenyaa. Keresete ga a ka a dira jalo. Ba ba neng ba tla kwa go ene be le ba ba neng ba setse ba laoletswepele ke Rara. Mowa oo o ne wa tswelela pele mme ka letsatsi lengwe o tla nna motho wa mmatota mo monneng yo o tla etelelang pele Lekgotla la Lefatshe Lotlhe la Dikereke, fela jaaka re ntse re bua. Mme ka gouta ya gagwe (gakologelwa gore Judase o ne a tshwere kgetsana ya madi a koleke) o tla laola lefatshe lotlhe, mme tsamaiso eo ya boganetsakeresete e tla nna mong wa sengwe le sengwe mme e leke go laola mongwe le mongwe. Mme Jesu o tla boa mme o tla ba senya botlhe ka kgalalelo ya go tla ga Gagwe. Mme phelelo ya bone e tla nna bodiba ja molelo.

Mme go tweng ka peo ya boammaaruri? Go tla diragala fela jaaka re buile. Batho ba Modimo ba baakanyediwa ka Lefoko la Boammaaruri go tloga ka morongwa go fitlhelela ka mpaka e. Mo go ene go tla nna le botlalo ja Pentekosete ka gore Mowa o tla busetsa batho kwa ba neng ba le teng kwa tshimologong. Ke gore "Go bua Morena."

Ke gore "Jaaka Morena a bua" gonne ke se Joele 2:23-26 e se buang,

"Ke gone, ipeleng lona bana ba Sione, le itumele mo go Jehofa Modimo wa lona; gonne o le naya pula ya sephai ka selekanyo se se siameng, o lo nesetsa pula, pula ya sephai le pula ya gogolammoko ka kgwedi ya ntlha.

Dibopi di tlaa tlaa mabele, le didibeletso di tlaa penologa bojalwa jwa mofine le lookwane.

Ke tlaa lo rebolela tsa dingwaga tse tsie e di jeleng, le boijane, le seboko, le mogokong, ntwaa ya me e kgolo e nkileng ka e roma mo go lona.

Lo tlaa jela mo letlotlong lo kgora, lo tlaa baka leina la ga Jehofa Modimo wa lona, yo o lo diretseng ka kgakgamatso; mme batho ba me ga ba ketla ba tlhajwa ke ditlhong gope."

Jaanong e bua gore Modimo o tsile go "buseletsa". Paka ya Lutere ga e a ka ya buseletsa kereke; e ne ya simolola phetogo. Paka ya ga Wesley ga e a ka ya buseletsa. Paka ya Pentekosete ga o a ka wa buseletsa. Mme Modimo o tshwanetse go ba busetsa ka gore ga a ka ke a gana Lefoko la Gagwe. Se ga se go tsoiwa ga Kereke; ke go "Busediwa" ga yone. Modimo o tla buseletsa Kereke kwa tshimologong ya Pentekosete. Jaanong elang tlhoko gore mo temaneng ya 25 e re bolelela gore ke ka ntlha ya eng fa re tlhoka go buselediwa. Tsie,boijane,seboko mogokong di jele gotlhe fa e se modi fela le sekoti fela sa thito. Jaanong re bolelelwa gore ditshenekegi tse tsotlhe di a tshwana mme di mo maemong a a farologaneng. Go ntse jalo. Ke mowa wa boganetsakeresete o o neng wa itshupa mo mokgatlhong, mo lekong le mo dithutong tsa maaka go tsamaya le makgolokgolo a dingwaga. Mme medi eo e e le kutu ya yone di tla buseletswa. Modimo ga a kitla a jala Kereke e ntšha, mme o tla buseletsa peo ya Gagwe ya tshimologo kwa go boela ko peong ya tshimologo. O dira jalo jaaka go boletswe mo temaneng ya bo 23, ka thuto, kana pula ya tshimologo. Morago ga moo go tla tla pula ya thobo kana tumelo e e phamolo.

Ka jalo, ka one motsotso o re mo tiragatsong e e feletseng ya Mathaio 24:24 "mo e leng gore, fa go kgonega, ba tla tsietsa ba ba kgethlilweng."* Mme ke mang yo o tla lekang go tsietsa ba ba kgethlilweng? Ke eng, ke mowa wa boganetsakeresete o o mo go ba ba "tloditsweng ka maaka" mo nakong e ya bofelo. Batho bano ba maaka ba setse ba tlile ka "Leina la ga Jesu" ba ipolela gore ba tloditswe ke Modimo gore ba tle mo letsatsing la bofelo. Ke bomesia ba maaka (batlodiwa). Ba ipolela gore ke baporofeti. A mme ba seoposengwe le Lefoko? Ga ba kake. Ba ne ba oketsa kana ba fokotsa mo go yone. Ga go na ope yo o ganetsang gore ba na le Mowa wa Modimo o o itshupang ka dimpho. Mme jaaka Balaame botlhe ba na le dithulaganyo tsa bone, ba ikuela ka madi, ba dirisa dimpho, mme ba gana Lefoko kana ba le itlhokomolosa ka go boifa gore kganetsano e ka fokotsa ditshono tsa bone tsa go bona poelo e kgolwane. Lefa go ntse jalo ba rera poloko le kgololo ka maatla a Modimo, fela jaaka Judase, ba na le bodiredi jo ba bo filweng ke Keresete. Mme ka gore ba ke peo e e phoso, ka jalo ba tlhotlhelediwa ke mowa o o phoso.

Bodumedi? Hey batho! Ba feta bakgethlwa ka maiteko le ka tlhoafalo, mme ke ba Laodikia, e seng ba ga Keresete, ka gore ba lebeletse boidiidi jo bogolo, dithulaganyo tse dikgolo le ditshupo tse di gagamatsang mo gare ga bone. Ba rera go tla ga bobedi ga ga Keresete, mme ba gana go tla ga moperofeti wa morongwa, le mororo ditshupu le tshenole ya boammaaruri tsa bodiredi ba gagwe di feta tsa bone botlhe. Ah ee, mowa o wa maaka o o leng gaufi thata le wa boammaaruri mo malatsing a bofelo, o ka farologangwa fela ka go fapoga ga one mo Lefokong, mme nako le nako fa o tshwarwa o le kgatthanong le Lefoko, o boela gape mo kgannyeng e le nngwe e re setseng re e supile gore ga se ya boammaariri: "Re bona madu, a ga go a nna jalo? Re tshwanetse go nna ba Modimo."

Jaanong pele ga re tswala, ke batla go tsisa kgopolo e. Re ntse re bua ka gore Peo ya Korong e a fitlhwana kana go katelwa, go tswa foo go bo go tlhoga dikala tse pedi, go tswa foo go bo go tlhoga sethota, go tswa foo go bo go tlhoga tsebe ya boammaaruri. Se se ka dira gore bangwe ba ipotse fa re ka re Balutere ba ne ba se na Mowa o o Boitshepo fela ka gonne ba ne ba ruta tshiamiso. Go ka nna ga dira gore bangwe ba ipotse ka Ba-Methodist, jalo le jalo. Nnyaa, ga re bue jalo. Ga re bue ka batho ka batho, mme re bua ka PAKA. Luther o ne a na le Mowa wa Modimo, mme paka ya gagwe e ne e se paka ya puseletso e e feletseng ka go tshololelwa ga mowa o o boitshepo jaaka kwa tshimologong. Go ne go tshwana le ka Wesley, Booth, Knox, Whitefield, Brainard, Jonathan Edwards, Meuller, jalo le jalo. Ruri ba ne ba tletse Mowa o o Boitshepo. Ee, ruri ba ne ba dira jalo. Mme paka e mongwe le mongwe wa bone a neng a tshela mo go yone e ne e se paka ya puseletso, e bile e ne e se paka epe fa e se paka e ya bofelo, paka ya botlhanogi jo bo maswe tota. O ke paka ya botlhanogi, mme ke paka ya puseletso, ke paka ya kgolokwe e e feletseng. Ka se, go fedile

Ka jalo re konela Dipaka tsa Dikereke tse Supa, re bua fela se Mowa o se buileng mo pakeng nngwe le nngwe, "Yo o nang le tsebe a a utlwe se Mowa o se buang le dikereke."

Ke dumela ka pelo yame yotlhe gore Mowa wa Modimo o ne o bua le rona, e seng fela go re ruta boammaaruri ja dipaka tse di fetileng, mme gape o ne o dira ka boikanyego mo dipelong tsa batho gore ba mo retologele ko go Ene. Ke lone lebaka la go bo re rera le go ruta, ka gonne ke ka go rera le go ruta Lefoko mo dinku di utlwang lentswe la Modimo le go mo sala morago.

Ga ke ise ke ko ke tsise molaetsa ope mo bathong gore ba tle ba ntshale morago, kana ba tsene kereke yame, kana ba simolole botsalano le mokgatlho mongwe. Ga ke ise ke ko ke dire jalo e bile ga ke kitla ke dira jalo jaanong. Ga ke kgatlhegele dilo tseo, mme ke kgatlhegela dilo tsa Modimo le batho, mme fa nka kgona go fitlhelela selo se le sengwe fela ke tla kgotsofala. Selo se le sengwe ke go bona go tlhomiwa kamano ya boammaaruri ya semowa fa gare ga Modimo le batho, eo mo go yone batho ba nnang dibopiwa tse disha mo go Keresete, ba tlatswa ka Mowa wa Gagwe mme ba tshela go ya ka Lefoko la Gagwe. Ke tla laletsa, ke kopa le go tlhagisa botlhe gore ba utlwe lentswe la Gagwe ka nako e, mme mo neele matshelo a bone ka botlalo, fela jaaka ke tshepa mo pelong yame gore ke mo file sengwe

le sengwe same. A Modimo a le segofatse, mme a go tla ga Gagwe go dire gore dipelo tsa lona di ipele.



www.messagehub.info

Thero Ka

William Marrion Branham

"... Mo Metlheng ya Lentswe la Moengele wa Bosupa ..." Tshenolo
(10:7)